

La Quotidiana 6-2-2015, p. 2

La grupp rumantscha dal cussegl grond elegia in nov president

■ (lr) Il 2001 ha la Lia Rumantscha lantschà la Grupp rumantscha dal cussegl grond, la grupp dals deputads rumantschs en il cussegl grond che ha l'intenziun d'agir sco visiunaria. Mintg'onn vegn elegì in nov president. Mesemna, ils 11 da favrer 2015 sa metta il vicepresident actual *Filip Dosch*, pcd, Cunter, a disposiziun per quest post. El è il successur dad Erwin Degonda, pcd, Trun, ch'è mort il december 2014.

In tema impurtant da la Grupp rumantscha dal cussegl grond il 2015 vegn ad esser l'iniziativa «Mo ina lingua estra en scola». En quest connex ha la regenza dal chantun Grischun laschà far in'expertisa ch'è vegnida a la conclusiun che l'iniziativa dal pievel è illegitima. Ella propona al cussegl grond d'annullar l'iniziativa. Quel vegn a s'occupar da l'iniziativa durant la sessiun d'avrigl. In ulteriur punct central sin il champ da furmaziun vegn ad esser la discussiun davart il plan d'instrucziun 21.

La Grupp rumantscha dal cussegl grond (actualmain 30 commembers) po envidar spezialists che contribueschan a la furmaziun da las opiniuns. Da la sesida dals 11 da favrer 2015 referescha *Oscar Knapp*, president da la SRG.R, davart las midadas en la nova lescha da radio e televisiun.